

Selekane Sinai



SABATHA MANTSIBOEA

Bakeng sa Boithuto ba Beke Ena Bala:

Deut. 1:29–31; Hos. 11:1; Tšen. 5:9; Deut. 29:10–13; Exod. 19:5, 6; Baroma 6:1, 2; Tšen. 14:12; Baroma 10:3.

Teman'a Khopolo:

““Le bone seo ke se entseng ho ba-Egepeta, le kamoo ke le pepileng kateng, ka mapheo a ntsu, ka le tliša ho ‘na’” (Exoda 19:4).

Moshanyana e monyane, e mong oa ba supileng, a hlhelo a ke kotsi, eaba o iso a sepetlele. Habo ba ne ba hlophehile. Ho ne ho se mohla a ka noang khalase e tletseng ea lebese. Haeba e ne e tletse, e ne aroleloa bana ba babeli, ‘me ea noang pele o ne a lokela ho ba hlokolosi hore a se noe ho feta tekano. Kamor’a hore moshanyana enoa a etsoe hore a phutholohe sepetlele, mooki a mo tlišetsa khalase e kholo e tšetseng lebese. A e talima ka cheseho nakoana eaba, ka ho hopola bohloki bo lapeng, oa botsa, ‘Ke noe hakae?’ Mooki, ka mahlo a maketseng le ‘metso o koalehileng, o re, ‘Le noe kaofela, ngoana, le noe kaofela!’” —H. M. S. Richards, “Mohau o se Nang Theko,” *Voice of Prophecy News*, Phuptjane 1950, leq. 4. Joalo ka moshanyana enoa, e ne e le monyetla oa Iseraele ea khale, joalo ka ha e le oa rona, ho noa haholo lilibeng tsa pholoho. Topollo ea Iseraele mengoahakholong ea bokhoba le khatello e ne e le pontšo e babatseng ea mohau oa Molimo. Ka mokhoa o tšoanang, mohau oa Molimo o ntse o le tšebetso bakeng sa tokoloho ea rona sebeng.

Beke ka Bokhutšoanyane: Jehova o ile a sebelisa karaburetso e fe ho hlalosa kamano ea Hae le Iseraele? Pale ea Exoda le Sinai li tšoana le pholoho ea motho ka mong ka litsela li fe? Mosebetsi oa molao e ne e le o fe seleaneng sa Sinai?

**Ithute thuto ea beke ena ho lokisetsa Sabatha sa la 15 Motšeanong.*

Ka Mapheo a Ntsu

E le sechaba, Iseraele e ne e qoetse kahar'a bohedene ba Egepeta ka mengoaha-khoho e mengata, boiphihlelo boo ho seng potang hore bo ne bo fifalitse tsebo ea bona ea Molimo, thato ea Hae, le molemo oa Hae. E be Jehova o tla ikhapela bona hape joang? Ho qala feela, o ne a tla bonahatsa bonnete ba lerato la Hae ho Iseraele, 'me sena o se entse ka liketso tsa Hae tse khoho tsa topollo. O ne a tla qala ho hapela sechaba sena karabong ea lerato ea tšisinyo ea Hae ea selekane. Molimo oa qala ka ho hopotsa sechaba sena ka liketso tsa Oona tsa mohau ho bona Sinai.

Ke litšoantšiso li fe tse pele tse hlalolang tsela eo Jehova a ntšitseng Iseraele Egepeta ka eona ho ea fihla Sinai?

Exod. 19:4, Deut. 32:10–12 _____

Deut. 1:29-31, Hos. 11:1 _____

Litšoantšiso tsee li ne li lokela ho ruta Iseraele (le rona) eng ka sebopelo sa katamelo ea Molimo ho sechaba sa Oona?

Litšoantšiso tsena li bontša hore Molimo oa rona o bona ho hloka thuo ha rona ka leihlo le nchocho. Bala Lipesalema 103:13, 14. Papisong ea ntsu le ea motsoali ea pepileng ngoana oa hae ka bobeli re bona khathatseho ea Molimo ka boiketlo ba rona. Bonolo, tšebetso, tlhomolelo, khothatso, takatso ea Hae ke ho re re fihlele khoho e felletseng. “Ntsu e ne e tsejoa ka boitelo ba eona bo sa tloaelehang bakeng sa malinyane a eona. Le eona e ne e phela lihlorong tsa lithaba. Ha e ruta malinyane a eona ho fofa, e ne e a jara ka mapheo a eona ho ea liphahameng tse holimo-limo tse shebileng phula ea Sinai , e be e a lahlela tlase botebong. Haeba lelinyane le ntse le le lenyane 'me le tšaba ho fofa, ntsu ena e tona e ne e tla fofela tlas'a lona, e le pepe, e be e fofela holimo ka lona hape ho ea sehlaheng se lilomong tse holimo. 'Me seo, o rialo lentsoe la Molimo, ke 'Kamoo ke le ntšitseng Egepeta ka le tlisa ho 'na.'” — George A. F. Knight, *Theology of Narration* (Grand Rapids, MI: William B. Eerdmans Publishing Company, 1976), leq. 128.

Bapisa thahasello ea Molimo ho rona le thahasello ea rona e mong ho e mong. Khathatseho ea Hae ka rona e lokela ho ama khathatseho ea rona ka ba bang joang? U ipapititse le boiphihlelo ba hau u le motho, ke lipapiso li fe tso u ka li sebelisang ho hlalosa thahasello e se nang boikhabo ea Molimo ho rona? Iketsetse lipapiso tse seng kae tsa hau, ho tsoa maiphihlelong a hau; u ka etsa le ho latela moetlo oa moo u phelang teng. Arolelana ka tsona le sehlopha sa hau.

Moralo oa Pholoho

“Ka baka lena, e-reng ho bana ba Iseraele: Ke ‘na Jehova, ke tla le jarolla boima ba ba-Egepeta, ke le loele litlamong tsa bona, ke le lopolle ka letsoho le otlolohileng, le ka likhahlolo tse kholo, ke tla inkela lona le be sechaba sa ka, ke be Molimo oa lona, ‘me le tla tseba hobane ke ‘na Jehova, Molimo oa lona, ea le jarollang boima ba ba-Egepeta’” (Exod. 6:6, 7).

Sheba litemana tse kaholimo: re bona tšiea e fe ho tsona, joalo ka pele, mabapi le mosebetsi oa Molimo ho batho kamanong ea selekane (Tsepama holim’a makhetho ao lentsoe Ke le hlahang litemaneng tseo)?

Topollo ea Iseraele bokhobeng ba ba-Egepeta le topollo ea Noe le lelapa la hae Moroallong ke liketsahalo tse peli tse kholo tsa topollo lingoliloeng tsa Moshe. Bobeli li fana ka leseli la mahlale a pholoho. Empa ke ketsahalo ea Exoda eo ka kotloloho e fanang ka moralo oa mantlha. Ha Molimo o re ho Iseraele (ka Moshe) “Ke le lopolle” (Exod. 6:6), ehlile o re “ke tla iketsa molopolli-oa habo lona” kapa go’el. “Lentsoe lopolla temaneng ea 6 [ea Exoda 6] le bua ka setho sa lelapa se rekang bocha kapa se lefellang setho se seng sa lelapa, haholo haeba setho seo se ne se le bokhobeng ba mokitlane kapa a le makhatheng a ho kena bokhobeng. Ho hlakile hore Iseraele o ne a se na oa habo lefatšeng ea ka mo lopollang, empa joale Molimo e ne se e le oa habo Iseraele, molopolli oa hae oa mohahabo..”—Bernard L. Ramm, *His Way Out* (Glendale, CA: Regal Books Division, G/L Publications, 1974), leq. 50.

U utloisisa taba ea Molimo ea ho “lefella,” kapa ho reka, sechaba sa Hae ho tsoa bokhobeng joang? Tefo e ileng ea lokela ho lefuoa e ne e le e fe? Seo se re bolella eng ka boleng ba rona? (Sheba Mareka 10:45, 1 Tim. 2:6, Tšen. 5:9)

Ho Exoda 3:8 Molimo o re o “theohile” ho namolela Iseraele. Ke leetsi le tloaelehileng la se-Heberu bakeng sa tšebetsano ea Molimo le batho. Molimo o leholimong, ‘me rona re lefatšeng, ‘me ke feela ha Molimo a “theohela” lefatšeng a ka re lopollang. Bonneteng ba taba, ke feela ha Jesu a ne a theohela fatše, a phela, a hlokoatsoa, a e-shoa, a ba a tsoosa sebakeng sa rona re ka lopolloang. “Lentsoe le ne le etsoe nama, ‘me la aha har’a rona” (Johanne 1:14) ke tsela e ‘ngoe ea hore Molimo o ile a theoha ho tla re pholosa.

Selekane sa Sinai

Buka ea Exoda e hulela maikutlo a motho liketsahalong tse tharo tsa mantlha. Joalo ka lithaba tse tharo, Lephallo ka bolona, ho thehoa ha selekane, kaho ea sehalalelo sa tabernakele li hlhella kaholimo ho maralla a liketsahalo tse nyane. Ho thehoa ha selekane, ho tlalehiloeng ho Exoda 19 ho isa ho 24, e ne e le eona Mount Everest [thaba e telele ka ho fetisisa lefatšeng] ea boraro boo. Ho lotomanya ka bokhutšoanyane Exoda 19 ho isa ho 24 ho bontša tlhahlamano ea liketsahalo tsa kamano.

Leha u ka hloka nako ea ho talima litemana tse thathamisitsoeng katlase kaofela ha tsona, tsepama holim'a tlhahlamano ea liketsahalo:

1. Ho fihla ha Iseraele Sinai le ho hloma litente kamor'a hore Jehova a ba lopolle (Exod. 19:1, 2).
2. Tšisinyo ea Molimo ea ho kena selekaneng le Iseraele (Exod. 19:3-6).
3. Karabelo ea Iseraele ha e ananela selekane (Exod. 19:7, 8).
4. Litokisetso tsa ho amohela selekane ka mokhoa o hlophishileng (Exod. 19:9-25).
5. Phatlalatso ea Melao e Leshome (Exod. 20:1-17).
6. Moshe e le eena mokena-lipakeng oa selekane (Exod. 20:18-21).
7. Ho boleloa litšiea tsa selekane (Exod. 20:22 to Exod. 23:22).
8. Kananelo ea selekane (Exod. 24:1-18).

Selekane sena se bapala karolo ea bohlokoahali leanong la pholoho. Ke selekane sa bone se ngotsoeng ka Bibeleng (se latela tse entsoeng le Adama, Noe, le Abrahamana), 'me ho sona Molimo oa iponahatsa ho feta pele, ka kotloloho nakong eo tšebeletso ea sehalalelo e theoang. Ka mokhoa o joalo, sehalalelo se fetoha tsela eo ka eona a bontšang sechaba leano la pholoho leo ba neng ba lokela ho le senolela lefatše.

Leha Jehova a n'a lopollotse Iseraele Egepeta, o n'a batla ba utloisise hore topollo e na le moelelo o moholo ka ho fetisa feela tokoloho ea nama bokhobeng. O ne a batla ho ba lopolla sebeng, bokhobeng ba mapomelo, 'me sena se ne se tla etsahala feela ka sehlabelo sa Mesia, joalo ka ha ho rutoa liriting le lipapisong tsa litšebeletso tsa sehalalelo. Ha ho makatse kahona, hore nako e khutšoanyane kamor'a hore ba lopolloe bokhobeng, 'me ba fueo molao, ba-Iseraele ba ile ba laeloa ho bopa litšebeletso tsa sehalalelo, hobane ka ho tsona Molimo o ne a senola leano la topollo—e leng moelelo oa 'nete le sepheo sa selekane. Hobane selekane ha se letho haeba e se selekane sa pholoho, eo Jehova a e neang batho ba oeleng. Ke seo e neng e le sona Edene, 'me ke seo e neng e le sona Sinai.

Hobaneng ha selekane mahareng a Molimo le sechaba sa Iseraele e ne e le ntho e hlokehang? (Sheba Deut. 29:10-13, hlokomela, hape, ntlha ea kamano ea selekane.)

Molimo le Iseraele

“Me joale ekare ha le ka fela la utloa lentsoe la ka, la boloka selekane sa ka, le tla ba letlotlo la ka la sebele har’a lichaba tse ling kaofela, etsoe lefatše lohle e le laka. Le tla ba ho ‘na ‘muso oa baprista, le sechaba se khethehilengke oona mantsoe ao o tlang ho a bolela ho bana ba Iseraele” (Exod. 19:5, 6). Litemaneng tsena Jehova o batla ho hlaba selekane le bana ba Iseraele. Leha ka bokhutšoanyane Jehova a ba bitsitse, pitso eo ha ba e neoe feela kantle ho khetho ea bona. Ba ne ba lokela ho ikamahanya. Le topollo ea bona Egepeta e ne e kenyellelitse ho ikamahanya ha bona: haeba ba ne ba sa etsa seo Jehova a se boletseng (joalo ka ho taka likosene tsa mamati ka mali), ba ka be ba sa lopolloa. HE ne e le bonolo bo joalo. Mona, le teng, Jehova ha a re ho bona, “Le ratang kapa le sa rate—le tla ba letlotlo le khethehileng ho ‘na le sechaba sa baprista.” Ha e sebetse joalo, ha se seo temana e se bolelang.

Bala Exoda 19:5, 6, e qotsuoeng kaholimo. U utloisisa joang seo Jehova a se bolelang moeelong oa pholoho ka tumelo? Na taelo ea ho latela e moo e fetola lefeela taba ea pholoho ka mohau ka tsela e itseng? Litemana tse latelang li u thusa ho utloisisa karabo joang? Baroma 3:19-24; Baroma 6:1, 2; Baroma 7:7; Tšen. 14:12.

“Ha re iphumanele pholoho ka kutlo ea rona; hobane pholoho ke mpho ea Molimo ntle ho tefo ea letho, e lokelang ho amoheloa ka tumelo. Empa kutlo ke tholoana ea tumelo.”—Ellen G. White, *Steps to Christ*, leq. 61.

Nahana ka seo Jehova a n’a ikemiselitse ho se etsetsa Iseraele: ha a ba lopolla ka mohlolo feela bokhobeng ba Egepeta, empa o ne boetse a batla ho ba etsa letlotlo la Hae, sechaba sa baprista. A beile kamano ea bona le Eena holim’a pholoho (ea nakoana, e leng ho tsoa bokhobeng ba Egepeta, le ea bosafeleng), Jehova o ne a batla ho ba phahamisetsa boemong bo phahameng ba moea, kelello, le boitšoaro hoo e ne e tla ba semaka ho lefatše leo la khale. Tsena tsohle bakeng sa hore a tle a ba sebelisetse ho ruta evangeli lichabeng. Seo ba ne ba lokela ho se etsa feela, e le ho arabela, e ne e le ho latela.

Boiphihlelo ba rona re le batho ka bo mong le Morena bo lokela ho bontša tšiea e tšoanang le eo re e bonang thutong ee ea kajeno ka litsela li fe?

Lipallo, Lipallo. . . . (Exod. 19:8)

Ka chalimo ea pele, tsohle li bonahala li apere toka. Jehova o lopolla sechaba sa Hae, o baballa lipallo tsa selekane, ‘me bona ba lumela: ba tla tseba tsohle tseo Jehova a ba laelang tsona hore ba li etse. Ke tumellano “e entsoeng leholimong,” ha ho joalo?

Bala litemana tse latelang. Li re fa leseli le fe mabapi le karabo ea Iseraele ho selekane?

Baroma 9:31, 32 _____

Baroma 10:3 _____

Baheb. 4:1, 2 _____

Sohle seo Jehova a re laelang sona hore re se etse, kamano ea rona le Eena e lokela ho thehoa holim’a tumelo. Tumelo e ba mohloli oo ho oona ho phallang mesebetsi. Mesebetsi ka bo eona, ho sa natse na e tšusumetso ea eona e hloekile hakae, hore na ke ea ‘nete hakae, hore e mengata hakae, ha e ka ke ea etsa hore re amohelehe mahlong a Molimo o halalelang. E sitiloe mehlang ea Iseraele, le nakong ea rona ea sitoa.

Haeba, ka tsela e fe kapa e fe, Bible e toboketsa taba ea mesebetsi, ke hobaneng ha mesebetsi e sitoa hore etsa hore re amohelehe mahlong a Molimo? (Sheba Esa. 53:6; Esa. 64:6; Baroma 3:23.)

Ka bomalimabe, sechaba sa ba-Heberu se ile sa lekanya hoba kutlo ea bona e ne e le tsela eo ka eona ba ka fumanang pholoho, e seng tholoana ea pholoho. Ba ne ba batla ho loka ka poloko ea bona ea molao, e seng ho loka ha Molimo, ho tlang ka tumelo. Selekane sa Sinai—leha se tla ka lethathamo le pharalletseng la litaelo le molao—se ne se reretsoe ho ba selekane sa mohau le sona joalo ka tse ling tse tlleng pele ho sona. Mohau ona, o fanoang feela, o fetola pelo ‘me o fana ka kutlo. Bothata, leha ho le joalo, e ne e se teko ea bona ea ho latela (selekane se ne se hloka hore ba latele); bothata e ne e le mofuta oa “kutlo” oo ba neng ba na le oona, oo e neng e se kutlo ea ‘nete, joalo ka ha nalane e ileng ea latela ea sechaba e bontšitse.

Bala Baroma 10:3 ka hloko, haholo karolo ea ho qetela. Pauluse o fetisa taba e fe moo? Ho etsahala eng ka batho ba batlang ho ithehela ho loka ha bona? Hobaneng ha teko eo e lebisa sebeng, ho hloka ho loka, le bokhelohi? Talima maphelo a rona. A na ha re kotsing ea ho etsa ntho e tšoanang?

Ho Ithuta Haholoanyane:

Bala Ellen G. White, “Lephallo,” maq. 281-290; “Ho Tloha Leoatleng le Lefubelu ho ea Sinai,” maq. 291-302; “Molao o Neouoeng Iseraele,” maq. 303-314, ho *Patriarchs and Prophets*. “Moea oa bokhoba o mengoa ka ho leka ho phela ka borapeli ba molao, ka ho leka ho phetha molao ka matla a rona. Tšepo e teng bakeng sa rona ha feela re kena tlas’a selekane sa Abrahamama, e leng selekane sa mohau ka tumelo ho Jesu Kreste. Evangeli e ileng ea rutoa Abrahamama, eo ka eona e bileng le tšepo, e ntse e le eona evangeli eo re e rutoang kajeno, eo ka eona re nang le tšepo. Abrahamama o ile a talima ho Jesu, e le Moqali le Mophethi oa tumelo ea rona.”—Ellen G. White Comments, *The SDA Bible Commentary*, pok. 6, leq. 1077. “Nakong ea bokhoba Egepeta ba-Iseraele ba bangata, ka matla a maholo, ba ne ba lahlehetsoe ke tsebo ea molao oa Molimo, ‘me ba se ba kopantse litao tsa oona le mekhoha le meetlo ea bohedene. Molimo oa ba isa Sinai, ‘me teng ka lentsoe la Hae a phatlalatsa molao oa Hae.”—Ellen G. White, *Patriarchs and Prophets*, leq. 334.

Lipotso tsa Puisano:

1. Kamano ea selekane e ne e reretsoe ho boloka bolokolohi ba Iseraele ba nama le ba moea ka litsela li fe? (Sheba Lev. 26:3-13; bapisa le Deut. 28:1-15.)
2. Bala hape Exoda 19:5, 6. Hlokomela hore Jehova o etsa polelo ena, “Lefatše lohle ke la ka.” Hobaneng ha a ka cho joalo, haholo boemong boo, boo a batlang ho thea selekane le sechaba sa see? Kutloisiso ea rona ea Sabatha, le seo e se bolelang, e kena joang moo?
3. re utloisisa hore re tšoareloa libe tsa rona ka mohau oa Molimo feela. Re utloisisa mosebetsi oa mohau e le o fe ntlheng ea ho re thusa ho phela bophelo ba tumelo le kutlo?

Kakaretso: Selekane seo Molimo a se entseng Sinai e ne e le selekane a mohau. Kamor’a hore a fane ka bopaki bo bongata ba lerato le mohau oa Hae le tlhokomelo ka topollo ea mohlolo bokhobeng ba Egepeta, Molimo oa memela sechaba ho kena selekaneng le Oona se tla boloka le ho khothaletsa tokoloho ea bona. Lehla Iseraele e ile ea arabela ka kananelo, ba ne ba se na tumelo ea ‘nete e susumetsoang ke lerato. Nalane ea bona hamoraa e supa hore, nako boholo, ba hlolehile ho utloisisa sebopeliso sa ‘nete sa selekane ‘me ba se senya ka ho se fetola tlhophiso ea pholoho-ka-mesebetsi. Ha rea lokela ho latela ho hloleha ha Iseraele e be re iphapanyetse mohau o fuoeng baetsalibe.